

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona”, broj: 7/10), a u vezi sa članom 25. Zakona o visokom obrazovanju („Službene novine Zeničko-dobojskog kantona”, broj: 6/09, 9/13, 13/13 i 4/15), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona na 93. sjednici, održanoj 13.04.2017. godine, d o n o s i

ZAKLJUČAK

o utvrđivanju Prijedloga Odluke o usvajanju Elaborata o opravdanosti promjene naziva Fakulteta za metalurgiju i materijale Univerziteta u Zenici u Metalurško-tehnološki fakultet Univerziteta u Zenici

I

Utvrđuje se Prijedlog Odluke o usvajanju Elaborata o opravdanosti promjene naziva Fakulteta za metalurgiju i materijale Univerziteta u Zenici u Metalurško-tehnološki fakultet Univerziteta u Zenici.

II

Prijedlog odluke iz tačke I. ovog zaključka upućuje se u dalju skupštinsku proceduru.

III

Zaključak stupa na snagu danom donošenja.

Broj: 02-_____/17.
Datum, 13.04.2017. godine
Zenica

PREMIJER

Miralem Galijašević

DOSTAVLJENO:

1x Stručna služba Skupštine,
1x Ministarstvo za obrazovanje, nauku, kulturu i sport,
1x a/a.

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 25. Zakona o visokom obrazovanju („Službene novine Zeničko-dobojskog kantona”, broj: 6/09, 9/13, 13/13 i 4/15), Skupština Zeničko-dobojskog kantona, na ____sjednici, održanoj _____ 2017. godine, d o n o s i

O D L U K U

**o usvajanju Elaborata o opravdanosti promjene naziva
Fakulteta za metalurgiju i materijale Univerziteta u Zenici u Metalurško-tehnološki fakultet
Univerziteta u Zenici**

Član 1.

Usvaja se Elaborat o opravdanosti promjene naziva Fakulteta za metalurgiju i materijale Univerziteta u Zenici u Metalurško-tehnološki fakultet Univerziteta u Zenici.

Član 2.

Odluka stupa na snagu danom donošenja, a objavit će se u „Službenim novinama Zeničko-dobojskog kantona“.

Broj: 01-_____/17.

Datum,

Z e n i c a

PREDSJEDAVAJUĆA

Draženka Subašić, s.r.

DOSTAVLJENO:

1x Ministarstvo za obrazovanje, nauku, kulturu i sport,
1x Stručna služba Skupštine,
1x Univerzitet u Zenici, Fakultetska 3 (putem Minsitarstva),
1x a/a

**UNIVERZITET U ZENICI
FAKULTET ZA METALURGIJU I MATERIJALE**

**ELABORAT O OPRAVDANOSTI PROMJENE NAZIVA FAKULTETA ZA
METALURGIJU I MATERIJALE UNIVERZITETA U ZENICI U METALURŠKO-
TEHNOLOŠKI FAKULTET UNIVERZITETA U ZENICI**

Zenica, oktobar 2016. godine

S A D R Ź A J

ELABORAT O OPRAVDANOSTI PROMJENE NAZIVA FAKULTETA ZA METALURGIJU I MATERIJALE UNIVERZITETA U ZENICI U METALURŠKO- TEHNOLOŠKI FAKULTET UNIVERZITETA U ZENICI

1. UVODNE NAZNAKE	3
1.1. Uvod	3
1.2. Pravni aspekti statusne promjene	3
1.3. Usklađivanje sa strateškim odrednicama razvoja UNZE za period 2015-2020. godine	7
1.4. Osnovna polazišta	7
2. RAZLOZI STATUSNE PROMJENE-PROMJENE NAZIVA FAKULTETA	8
2.1. Procjena opravdanosti statusnih promjena	8
2.2. Povezanost opravdanosti statusnih promjena sa savremenim trendovima u visokom obrazovanju i naučno-istraživačkom radu	9
3. ZNAČAJ STATUSNIH PROMJENA(promjene naziva Fakulteta i naziva studijskih programa)	10
4. FINANSIJSKI ASPEKTI STATUSNIH PROMJENA	10
5. ZAKLJUČAK S PRIJEDLOGOM	10
6. KORIŠTENI DOKUMENTI	11

1. UVODNE NAZNAKE

1.1.Uvod

Odlukom Naučno-nastavnog vijeća Fakulteta za metalurgiju i materijale Univerziteta u Zenici, broj:02-200-001-0751/14., od 17.11.2014. godine, a zbog zakonske i statutarne obaveze revizije Nastavnog plana i programa u primjeni svake 4 godine, imenovan je Tim sa zadatkom da izvrši cjelovito preispitivanje (reviziju) Nastavnog plana i programa I ciklusa (dodiplomskog) studija na Fakultetu za metalurgiju i materijale Univerziteta u Zenici.

U okviru rada Tima za reviziju NPP-a I ciklusa (dodiplomskog) studija, a u skladu sa strategijom razvoja Fakulteta i Univerziteta u Zenici, dekan Fakulteta za metalurgiju i materijale, zajedno sa Katedrom za hemiju i fiziku, uočili su i predložili opravdanost promjene naziva Fakulteta za metalurgiju i materijale Univerziteta u Zenici u naziv Metalurško-tehnološki fakultet, zbog prepoznatljivosti koncepta i sadržaja diploma koje se stiču na Fakultetu iz samog naziva Fakulteta, a vodeći računa prije svega o misiji i viziji razvoja Univerziteta u Zenici i misiji i viziji razvoja Fakulteta, s mogućnošću proširenja matičnosti Fakulteta koja, trenutno, na bitan način ograničava razvoj Fakulteta za metalurgiju i materijale Univerziteta u Zenici, kao i njegovo profiliranje u okviru visokoobrazovnog sistema BiH.

Na temelju prijedloga Katedre za hemiju i fiziku, postupajući u skladu s odredbama člana 68. Stav (1) Zakona o visokom obrazovanju („Sl. novine Zeničko-dobojskog kantona“, broj: 6/09, 9/13, 13/13 i 4/15), člana 21. C stav 2. alineja3. i 6. Zakona o javnoj ustanovi Univerzitet u Zenici („Sl. novine Zeničko-dobojskog kantona“, broj: 6/05, 11/06, 10/11, 16/11,15/12 i 13/13), a u vezi s odredbama člana 127. stav (1) tačka e) i f) i stava (2) Statuta Univerziteta u Zenici, nakon prihvatanja prijedloga na 5. sjednici Naučno-nastavnog vijeća Fakulteta za metalurgiju i materijale od 11.02.2016. godine za promjenom naziva Fakulteta i promjenom naziva studijskih programa inoviranog NPP-a s primjenom od akademske 2017/2018. godine, dekan Fakulteta donio je Odluku o formiranju Komisije za realizaciju prijedloga promjene naziva Fakulteta broj: 02-100-001-0174/16. od 02. 03.2016. godine.

1.2.Pravni aspekt statusne promjene

Navedenom odlukom dekana Fakulteta za metalurgiju i materijale formirana je Komisija za izradu Elaborata o opravdanosti promjene naziva Fakulteta u sastavu:

1. Prof. dr. sc. Hasan Avdušinović, prodekan za NIR, predsjednik
2. Prof. dr. sc. Farzet Bikić, član
3. Prof. dr. sc. Jusuf Duraković, član i
4. Arifa Čuruković, dipl. iur., član

Zadatak Komisije je bio izraditi Prijedlog elaborata o opravdanosti promjene naziva Fakultetu za metalurgiju i materijale u naziv Metalurško-tehnološki fakultet, kao i Prijedlog elaborata o opravdanosti promjene naziva studijskih programa i proširenja matičnosti Fakulteta u skladu sa Izvještajem Tima za cjelovito preispitivanje (reviziju) Nastavnog plana i programa I ciklusa studija.

Pravni osnov statusnih promjena Fakulteta za metalurgiju i materijale Univerziteta u Zenici definisan je odredbama člana 25. Zakona o visokom obrazovanju („Sl. novine Zeničko-dobojskog kantona“, broj: 6/09, 9/13, 13/13 i 4/15) kojim se u stavu (1) utvrđuje da visokoškolska ustanova (JU Univerzitet u Zenici) može, u skladu sa zakonom, proširiti,

odnosno promijeniti djelatnost, naziv i sjedište, kao i vršiti statusne promjene: spajanje, pripajanje, podjelu i izdvajanje.

U članu 21. Zakona o ustanovama ("Sl. list R BiH, broj: 6/92, 8/93 i 13/94) u stavu 1., utvrđuje se da je naziv ustanove ime pod kojim ustanova radi, da ustanova može promijeniti naziv uz saglasnost osnivača, odluka o promjeni naziva ustanove donosi se na način utvrđen pravilima (Statutom) ustanove.

U stavu 2. istog člana propisano je da se Pravilima (Statutom) ustanove može utvrditi da dio ustanove iz člana 13. Ove uredbe (zakona) može, uz naziv ustanove dodati i bliži naziv tog dijela ustanove.

U članu 22. stav 1. Zakona o ustanovama utvrđeno je da naziv ustanove upućuje na djelatnost i sjedište ustanove.

U članu 6. stav 1. Zakona o Javnoj ustanovi Univerzitet u Zenici („Sl. novine Zeničko-dobojskog kantona“, broj: 6/05, 11/06, 10/11, 16/11, 15/12 i 13/13) propisano je da će se Univerzitet upisati u sudski registar kao javna ustanova sa organizacionim jedinicama u svom sastavu, i u alineji 1. istog člana stoji naziv Fakulteta- Fakultet za metalurgiju i materijale u Zenici.

U članu 7. stav 4. istog zakona, propisano je da u pravnom prometu organizacione jedinice istupaju pod nazivom Univerziteta i svojim nazivom, a u članu 8., da će se Pravilima (Statutom) Univerziteta bliže urediti naziv, sjedište, djelatnost i ovlaštenja u pravnom prometu organizacionih jedinica Univerziteta, u skladu sa Zakonom o visokom obrazovanju i ovim zakonom.

U navedenim zakonskim odredbama propisano je da se promjena naziva i sjedišta javne ustanove, kao i promjena naziva i sjedišta njezinog dijela - u konkretnom slučaju organizacione jedinice Fakultet za metalurgiju i materijale vrši uz saglasnost osnivača, odnosno izmjenom Zakona o Javnoj ustanovi Univerzitet u Zenici.

Pravni osnov za promjenu naziva Fakulteta utemeljen je odredbama navedenih zakona, posebno člana 25. Zakona o visokom obrazovanju Zeničko-dobojskog kantona, u kojem je stavom (2) propisano da prije donošenja odluke o statusnoj promjeni Osnivač Univerziteta u Zenici usvaja elaborat o opravdanosti statusne promjene, koja se u konkretnom prijedlogu u skladu sa stavom (1) istog člana odnosi i na promjenu naziva i sjedišta Fakulteta za metalurgiju i materijale u novi naziv Metalurško-tehnološki fakultet.

U stavu (3) istog člana utvrđen je sadržaj elaborata, i to: opravdanost potrebe za statusnom promjenom, dužina trajanja studija, okvirni nastavni plan i nastavni program, stručni naziv koji se stiče po završetku studija, ispunjavanje općih i posebnih uvjeta po standardima visokog obrazovanja i normativima, sredstva potrebna za ispunjavanje tih uvjeta i način njihovog osiguravanja, a stavom (4) istog člana propisano je da prijedlog elaborata, uz prethodno provedenu proceduru na prijedlog Naučno-nastavnog vijeća Fakulteta usvaja Senat Univerziteta u Zenici, odnosno visokoškolska ustanova Univerzitet u Zenici i podnosi Osnivaču radi donošenja konačne odluke.

Pravni osnov za statusne promjene OJ Fakultet za metalurgiju i materijale Univerziteta u Zenici predstavljaju i odredbe člana 20. Statuta Univerziteta u Zenici, kojim je propisana i

utvrđena procedura na osnovu člana 25. Zakona o visokom obrazovanju Zeničko-dobojskog kantona, pripreme i usvajanja elaborata o opravdanosti statusnih promjena od strane Osnivača JU Univerzitet u Zenici.

Nadležnost dekana i Naučno-nastavnog vijeća Fakulteta za metalurgiju i materijale Univerziteta u Zenici za postupanje u skladu s naprijed navedenim, utvrđena je u odredbama članova 67. i 68. Zakona o visokom obrazovanju („Sl. novine Zeničko-dobojskog kantona“, broj: 6/09, 9/13, 13/13 i 4/15), člana 21. c i 21. b Zakona o javnoj ustanovi Univerzitet u Zenici („Sl. novine Zeničko-dobojskog kantona“, broj: 6/05, 11/06, 10/11, 16/11, 15/12 i 13/13), te odredbama člana 114. stav (1) i 127. stav (1) tačka e) i f) i stav (2) Statuta Univerziteta u Zenici.

Za postupanje u skladu s naprijed navedenim i usvajanje elaborata o opravdanosti statusne promjene, u konkretnom slučaju promjene naziva Fakulteta i naziva studijskih programa I ciklusa studija nadležan je Senat Univerziteta u Zenici, što je propisano odredbama člana 53. stavovi (1), (2) i (3) Zakona o visokom obrazovanju („Sl. novine Zeničko-dobojskog kantona“, broj: 6/09, 9/13, 13/13 i 4/15), kao i članom 19. a stav 2. Zakona o Javnoj ustanovi Univerzitet u Zenici („Sl. novine Zeničko-dobojskog kantona“, broj: 6/05, 11/06, 10/11, 16/11, 15/12 i 13/13) i odredbama člana 63. Statuta Univerziteta u Zenici.

U izradi Elaborata o opravdanosti promjene naziva Fakulteta za metalurgiju i materijale Univerziteta u Zenici, pored dokumenta Strategija razvoja Univerziteta u Zenici za period 2015-2020, korišteni su i drugi dokumenti vezani za djelatnost Univerziteta u Zenici kao što su Vizija, misija i ciljevi Fakulteta i Univerziteta, Strategija razvoja naučno-istraživačkog i istraživačko-razvojnog rada u Federaciji BiH za period 2012-2022, Strategija naučno-tehnološkog razvoja BiH Akademijenauka i umjetnosti Bosne i Hercegovine, Strategija razvoja Zeničko-dobojskog kantona za period 2016-2020.

Misija Univerziteta u Zenici zasniva se na tri osnovne komponente visokog obrazovanja:

- nastavno-naučni (obrazovni) rad
- naučno-istraživački rad
- servis društvene zajednice

Radi lakšeg sagledavanja i upravljanja procesima na Univerzitetu, ove tri komponente koje su međusobno uvjetovane, se mogu raščlaniti na sljedeći način:

- obrazovanje, kako kroz nastavni tako i kroz naučno-istraživački proces, visokokvalitetnih, mladih stručnjaka (studenata), ali i odraslih, u svim oblastima nastave koje postoje na Univerzitetu, tako da mogu biti produktivni u svojim postojećim i budućim aktivnostima
- kontinuirano praćenje i unapređivanje naučno-istraživačkog, razvojnog i inovacijskog rada na Univerzitetu; osposobljavanje (obrazovanje) i uključivanje što većeg broja mladih ljudi (asistenata i drugog podmlatka) u ovaj proces
- povezivanje Univerziteta s okolinom, privrednim i kulturnim zbivanjima kojima se stvaraju pretpostavke da UNZE bude istinski lider regiona koji je uključen u sva važna zbivanja kao generator promjena i razvoja

Misija UNZE-a uključuje pomaganje ekonomskog, socijalnog i kulturnog razvoja unutar i izvan granica regiona i države, osiguravajući i pružajući naučnu i tehničku podršku. Pri tome, UNZE se mora uklapati u nacionalne i internacionalne kriterije kvaliteta obrazovanih i

naučnih djelatnosti i rezultata. Drugim riječima, svi rezultati nastavno-naučnog, naučno-istraživačkog i stručnog rada na UNZE-u moraju sadržavati karakter univerzalnih vrijednosti, koje se ne mjere regionalnim kvalitativnim ocjenama.

Vizija razvoja Univerziteta u Zenici

Vizija je da Univerzitet u Zenici postane moderna i cijenjena visokoškolska institucija, uključena u zajednički akademski prostor Evrope i svijeta, a da bi se to postiglo neophodno je obezbijediti uslove za realizaciju kvalitetnih nastavnih procesa, što podrazumijeva, između ostalog, obezbjeđenje kvalitetnih laboratorija za realizaciju praktične nastave i naučno-istraživačkog rada što Fakultet u određenom smislu posjeduje, a nadopunjava kroz saradnju sa OJ Metalurški institut "Kemal Kapetanović" Univerziteta u Zenici, iu saradnji s drugim privrednim i naučnim institucijama u BiH, i van prostora BiH.

Univerzitet u Zenici bi do 2020., trebao biti visokoškolska institucija srednje veličine, koja ima od 12 do 14 organizacionih jedinica (fakulteta, instituta i dr.) i oko 30-ak studijskih programa, a planirani broj studenata je od 8000 do 10000. Objekti će biti raspoređeni u dva kampusa (prirodne i tehničke nauke, s jedne strane, i društvene i humanističke, s druge strane), čija će ukupna površina biti oko 60000 m². Univerzitet bi trebao imati 550-600 uposlenih osoba.

Jedan od strateških ciljeva razvoja Zeničko-dobojskog kantona jeste razvoj visokog obrazovanja i naučno-istraživačkog rada. Ostvarivanje ovog cilja predstavlja osnovni uslov za transformaciju iz sadašnjeg predavačkog u poduzetnički univerzitet.

Strategijom razvoja ZDK za period 2016-2020. godine posebno su istaknuti u prioritetnim ciljevima i segmenti:

- Unaprijediti kvalitet usluga javne uprave i jačati segment pravde i sigurnosti
- Jačati i podržati obrazovanje, sport i kulturu i unaprijediti tržište radne snage
- Unaprijediti kvalitet življenja stanovnika ZDK kroz dimenziju zdravlja
- Povećati kvalitet i efikasnost usluga i podržati reformske aktivnosti u oblasti socijalne zaštite

Strateški cilj pod brojem 3., je Unapređenja kvaliteta življenja kroz stvaranje održivog i pravičnog društvenog okruženja sa prioritetnim ciljem 3.2. Jačanja i podržavanja obrazovanja, sporta i kulture te unaprijeđenja tržišta radne snage, kroz mjere jačeg povezivanja obrazovanja i tržišta rada te razvoja sistema osposobljavanja, usavršavanja i sistema cjeloživotnog učenja. Cilj mjera je - Plasirati na tržište rada studenti učenike obučene za tražene poslove, usavršavanje sistema obrazovanja sa izmjenama tržišta rada, kao i cjeloživotno poduzetničko učenje razvijeno u formalnom obrazovanju na svim obrazovnim nivoima.

U odjeljku Projektne aktivnosti utvrđeno je da se na osnovu analize stanja u oblasti zapošljavanja sa projekcijom budućih potreba izvrši inoviranje postojećih i uvođenje novih nastavnih planova i programa, kao i uvođenje novih zvanja i zanimanja (srednje i visoko obrazovanje), kao i kontinuirana obuka nastavnog osoblja sa ciljem aktualiziranja njihovih znanja i razvijanja dodatnih vještina. Također je navedena potreba procentualnog povećanja obima praktične nastave/rada i unaprijeđenje kvaliteta praktičnog dijela nastave i obavezne studentske prakse. Podizanjem inovativne sposobnosti studenata kroz kurseve za nastavnike i studente iz oblasti inovativnosti također je odrednica Strategije te organiziranje i održavanje takmičenja inovatora.

Elaborat o opravdanosti promjene naziva Fakulteta za metalurgiju i materijale Univerziteta u Zenici predstavlja prijedlog koncepta statusnih promjena u skladu s prepoznatljivim ključnim strateškim potrebama na tržištu rada i potreba u okviru akademske zajednice, a prije svega prepoznatljivosti koncepta i sadržaja diploma koje se stiču na Fakultetu iz samog naziva Fakulteta, a vodeći računa prije svega o misiji i viziji razvoja Univerziteta u Zenici i misiji i viziji razvoja Fakulteta. U tom smislu Elaborat predstavlja osnovu za jačanje tehnološko (tehničke) komponente na Univerzitetu u Zenici, te pozicioniranje uloge tehnoloških/tehničkih i prirodnih znanosti, odnosno naučnih disciplina u kontekstu društvenih potreba i razvoja kako privrede tako i nauke i naučne misli.

1.3.Usklađivanje sa strateškim odrednicama razvoja UNZE za period 2015-2020.godine

U dokumentu pod nazivom Strategija razvoja Univerziteta u Zenici za period 2015-2020. godine (20 programa razvoja na Univerzitetu u Zenici) stoji da je vizija Univerziteta u Zenici da postane moderna i respektabilna visokoškolska institucija, uključena u zajednički akademski prostor Evrope i svijeta, odnosno ovom vizijom UNZE bi do 2020. godine trebalo da stasa u fleksibilni univerzitet s 12 članica(organizacionih jedinica: fakulteta, instituta i dr.) koji će davati okvirno 30 vrsta diploma (studijskih programa) i imati od osam do deset hiljada studenata, koji će živjeti i raditi u više funkcionalnih kampusa. Svrha razvoja visokog obrazovanja, naučno-istraživačkog, razvojno-inovativnog i stručnog rada u Zenici, kroz formu i organizacionu strukturu Univerziteta u Zenici jeste, da se na organiziran i prethodno osmišljen način iskoriste raspoloživi resursi i usmjere buduće aktivnosti na planu razvojanaučno-nastavnog (obrazovanje),naučno-istraživačkog, razvojnog i inovativnog rada.

U okviru misije Univerziteta u Zenici, konstatira se damisija Univerziteta uključuje pomaganje ekonomskom, socijalnom i kulturnom razvoju unutar i izvan granica regiona i države putem pružanja naučne i tehničke podrške uz uklapanje u nacionalne i internacionalne kriterije kvaliteta obrazovanja, naučnih djelatnosti i rezultata.

U okviru navedenih Strateških ciljeva pozicioniranje Fakulteta za metalurgiju i materijale i njegovo strateško opredjeljenje jeste sastavni dio koncepta razvoja Univerziteta zasnovano na razvoju naučno-nastavnog i naučno-istraživačkog rada fundamentalnih i primjenjenih nauka kompatibilnih zahtjevima društva budućnosti koje mora biti sposobno za konkurenciju na svjetskom tržištu i koje će pokretati razvoj regije, u postojećim i budućim matičnim oblastima koje se izučavaju, i koje će se izučavati na Fakultetu s promjenjenim nazivom u Metalurško-tehnološki fakultet.

1.4.Osnovna polazišta

Pravni osnov za predloženu promjenu naziva Fakulteta u Metalurško-tehnološki fakultet u prvom redu čini Zakon o ustanovama R BiH, Zakon o visokom obrazovanju Zeničko-dobojskog kantona kojim se utvrđuje strateški interes i potrebe Kantona u oblasti visokog obrazovanja, mjere za osiguranje razvoja i unaprijeđenje kvaliteta visokog obrazovanja, finansiranje, kao i druga pitanja od značaja za razvoj visokoškolske djelatnosti na području Kantona.

U članu 11. Zakona o visokom obrazovanju ZDK univerzitet se definira kao visokoškolska ustanova koja realizuje najmanje pet različitih studijskih programa u prirodnim, tehničkim, društvenim, biomedicinali zdravstvo, biotehničkim i humanističkim naukama, kako je propisano i Okvirnim zakonom o visokom obrazovanju u BiH.

2. RAZLOZI STATUSNE PROMJENE-PROMJENE NAZIVA FAKULTETA

2.1. Procjena opravdanosti statusnih promjena

Na većini univerziteta u okruženju nazivi fakulteta ovog profila su ili tehnološko-metalurški, ili metalurško-tehnološki sa strukturom studijskih programa kako slijedi:

Beograd

Univerzitet u Beogradu

Tehnološko-metalurški fakultet

Studijski programi:

1. Hemijsko inženjerstvo
2. Inženjerstvo materijala
3. Biohemijsko inženjerstvo i biotehnologija
4. Inženjerstvo zaštite životne sredine
5. Metalurško inženjerstvo
6. Tekstilna tehnologija

Podgorica

Univerzitet Crne Gore

Metalurško-tehnološki fakultet

Studijski programi:

1. Metalurgija
2. Hemijska tehnologija
3. Zaštita životne sredine

Skoplje

Univerzitet "Sv.Kiril i Metodij" Skoplje

Tehnološko-metalurški fakultet

Studijski programi:

1. Dizajn i inženjering odjeće
2. Metalurgija, dizajn i menadžment
3. Inženjerstvo materijala i nanotehnologije
4. Neorgansko inženjerstvo i zaštita životne sredine
5. Polimerni materijali, dizajn i menadžment
6. Prehrambena tehnologija i biotehnologija
7. Dizajn i menadžment tehnoloških procesa

Ljubljana

Univerza v Ljubljani

Naravoslovnotehniška fakulteta

Studijski programi:

1. Odsjek za tekstil
2. Odsjek za materijale i metalurgiju
3. Odsjek za geologiju
4. Odsjek za geotehnologiju i rudarstvo
5. Odsjek za hemijsko obrazovanje i informatiku

Fakultet za metalurgiju i materijale Univerziteta u Zenici je kroz svoj 57-mo godišnji rad i postojanje kao jedini fakultet u BiH metalurške struke s najdužom tradicijom visokog obrazovanja na prostorima Srednje Bosne u više navrata, vodeći računa o savremenim kretanjima u oblasti visokog obrazovanja i naučno-istraživačkog rada, te potreba tržišta, strukturirao svoje programe otvarajući nove odsjeke, odnosno studijske programe i usmjerenja kako na dodiplomskom tako i na postdiplomskom studiju i kroz sticanje naučnog stepena doktora tehničkih nauka iz matičnih oblasti, a u skladu s tim radi prepoznatljivosti diploma, mijenjao i naziv Fakulteta što se vidi iz slijedećeg pregleda- Etape razvoja Fakulteta od 1959. do 2016. godine.

ETAPE RAZVOJA FAKULTETA OD 1961. DO 2016. GODINE

Datum/Godina	Događaj(i)
20.10.1959.	Osnivanje Visoke tehničke škole za metalurške inženjere
1961.	Transformacija Visoke tehničke škole u Metalurški fakultet-Opšti smjer
1964.	Osnivanje Odsjeka za ljevarstvo
1968.	Osnivanje Odsjeka za metalurgiju neželjeznih metala
1973.	Osnivanje Odsjeka za mašinstvo u metalurgiji
1977.	Transformacija Odsjeka za mašinstvo u metalurgiji u Mašinski fakultet
1989.	Osnivanje Odsjeka za metalne materijale
1997.	Osnivanje Odsjeka za nemetalne materijale
1998.	Transformacija Metalurškog fakulteta u Fakultet za metalurgiju i materijale
	Odsjek za metalurgiju Odsjek za metalurgiju gvožđa i čelika Odsjek za metalurgiju neželjeznih metala Smjer za ljevarstvo Smjer za plastičnu preradu metala Odsjek za metalne materijale Odsjek za nemetalne materijale
2000.	Osnivanje Univerziteta u Zenici
2004/2005.	Izdvajanje Fakulteta za metalurgiju i materijale od Univerziteta u Sarajevu i ulazak u sastav Univerziteta u Zenici
2005/2006.	Početak primjene Bolonjskog procesa (4+1+3)
2006.	Osnivanje Odsjeka za hemiju Smjer za hemijsko inženjerstvo
2009.	Transformacija Odsjeka i smjerova I ciklusa (dodiplomskog) studija Fakulteta za metalurgiju i materijale, i to: Odsjek za metalurgiju Odsjek za materijale Odsjek za hemijsko inženjerstvo

2.2.Povezanost opravdanosti statusnih promjena sa savremenim trendovima u visokom obrazovanju i naučno-istraživačkom radu

Pravci razvoja visokog obrazovanja u Zeničko-dobojskom kantonu treba da se orijentiraju ka razvoju sistema visokog obrazovanja po najboljoj evropskoj i svjetskoj praksi, a to znači povećanje procenta upisa na univerzitet odnosno fakultete, povećanje ponude novih studijskih programa, veću efikasnost studiranja, internacionalizaciju studija, veći stepen mobilnosti i povezanosti tržišta rada sa visokim obrazovanjem, te prepoznatljivu i priznatu diplomu kao mjerilo znanja i dostignutih kompetencija.

3. ZNAČAJ STATUSNIH PROMJENA (promjene naziva Fakulteta i naziva studijskih programa)

Bez ulaganja se omogućava kroz promjenu naziva Fakulteta za metalurgiju i materijale u naziv Metalurško-tehnološki fakultet prepoznatljivost koncepta i sadržaja diploma koje se stiču na Fakultetu iz samog naziva Fakulteta, a vodeći računa prije svega o misiji i viziji razvoja Univerziteta u Zenici i misiji i viziji razvoja Fakulteta.

Promjena naziva Fakulteta otvara mogućnost proširenja matičnosti Fakulteta i uvođenje, odnosno osnivanje novih studijskih programa i jačanje tehnološko (tehničke) komponente na Univerzitetu u Zenici, te pozicioniranje uloge tehnoloških/tehničkih i prirodnih znanosti, odnosno naučnih disciplina u kontekstu društvenih potreba i razvoja kako privrede tako i naučne misli u matičnim oblastima Fakulteta.

4. FINANSIJSKI ASPEKTI STATUSNIH PROMJENA

Statusne promjene, odnosno promjena naziva Fakulteta za metalurgiju i materijale u Metalurško-tehnološki fakultet Univerziteta u Zenici i promjene naziva studijskih programa sa usmjerenjima, ne iziskuju nikakva dodatna finansijska sredstva.

Kao što je već istaknuto, a utvrđeno članom 25. Zakona o visokom obrazovanju Zeničko-dobojskog kantona („Sl. novine Zeničko-dobojskog kantona“, broj: 6/09, 9/13, 13/13 i 4/15) visokoškolskoj ustanovi se omogućava u skladu sa zakonom da proširi, odnosno promjeni djelatnost, naziv i sjedište, kao i vršenje statusne promjene: spajanje, pripajanje, podjelu i izdvajanje, a to se čini usvajanjem elaborata o statusnoj promjeni, u konkretnom slučaju promjeni naziva Fakulteta i promjeni naziva studijskih programa, s mogućnošću proširenja matičnosti Fakulteta osnivanjem novih studijskih programa.

Jedini finansijski izdaci kod promjene naziva Fakulteta, nakon sudske registracije promjene naziva OJ Fakultet za metalurgiju i materijale u OJ Metalurško-tehnološki fakultet Univerziteta u Zenici, a na osnovu usvojenog Zakona o izmjenama Zakona o JU Univerzitet u Zenici od strane Skupštine Zeničko-dobojskog kantona su sudska taksa za promjenu naziva Fakulteta u Registru koji vodi Općinski sud u Zenici, te sredstva za izradu novih pečata i štambilja Fakulteta, što je zanemariv finansijski trošak.

5. ZAKLJUČAK S PRIJEDLOGOM

U svom radu Komisija za izradu Elaborata o opravdanosti statusnih promjena se rukovodila mnoštvom dokumenata i zakonskih odredbi iz oblasti visokog obrazovanja i nauke u BiH, a posebno važećih pravnih akata kao što su Zakon o visokom obrazovanju Zeničko-dobojskog kantona, Zakon o Javnoj ustanovi Univerzitet u Zenici, Zakon o ustanovama BiH, Statut Univerziteta u Zenici, te dokumentima strateške naravi koji regulišu viziju razvoja visokog obrazovanja i naučno-istraživačkog i stručnog rada Univerziteta u Zenici, Kantona i šire.

Sagladevajući sve pravne, društvene i stručne aspekte, koji proizilaze iz prijedloga za promjenom naziva Fakulteta za metalurgiju i materijale u Metalurško-tehnološki fakultet, i promjenom naziva studijskih programa s mogućnošću proširenja matičnosti Fakulteta u budućnosti otvaranjem novih atraktivnih i društvenoj zajednici potrebnih studijskih programa, Komisija zaključuje da postoji pravna, društvena i stručna opravdanost i utemeljenost navedenog prijedloga, te s tim u vezi, predlaže da se dosadašnjem Fakultetu za metalurgiju i materijale Univerziteta u Zenici promjeni naziv u METALURŠKO-TEHNOLOŠKI FAKULTET UNIVERZITETA U ZENICI, i time osigura prepoznatljivost koncepta, sadržaja

i naziva diploma, odnosno izlaznih kvalifikacija koje se stiču na Fakultetu iz samog naziva Fakulteta, te osigura razvijanje novih studijskih programa iz oblasti tehničkih/inženjerskih i prirodnih nauka.

Komisija je posebno vodila računo dugogodišnjoj tradiciji naziva „Metalurški fakultet”, te iz poštovanja prema tradiciji metalurgije u Zenici i prepoznatljivosti naziva kao brenda u zemlji i inostranstvu po kvalitetnim stručnim i naučno-istraživačkim kadrovima koji svoja znanja, vještine i kompetencije od 1959. godine kada je osnovana i počela sa radom Visoka tehnička škola metalurške struke, odnosno od 1961. godine Metalurški fakultet, a od 1998. godine Fakultet za metalurgiju i materijale do danas, stiču na ovom Fakultetu, u prijedlogu novog naziva Fakulteta zadržala termin **(Metalurško)**, a na drugo mjesto postavila termin **(Tehnološki)**.

Novi predloženi naziv Fakulteta, **Metalurško-tehnološki fakultet**, daje prepoznatljivost izlaznim diplomama/kvalifikacijama koje se stiču na Fakultetu kroz postojeće i buduće studijske programe.

6. KORIŠTENI DOKUMENTI

1. Zakon o ustanovama („Sl. list R BiH“, broj: 6/92, 8/93 i 13/94)
2. Okvirni zakon o visokom obrazovanju u Bosni i Hercegovini („Sl. glasnik BiH“, broj: 59/07 i 59/09)
3. Zakon o visokom obrazovanju („Sl. novine Zeničko-dobojskog kantona“, broj: 6/09, 9/13, 13/13 I 4/15),
4. Zakon o javnoj ustanovi Univerzitet u Zenici („Sl. novine Zeničko-dobojskog kantona“, broj: 6/05, 11/06, 10/11, 16/11, 15/12 i 13/13),
5. Statut Univerziteta u Zenici (Prečišćen tekst- Odluka UO Univerziteta broj: 01-101-701-2963/12 od 06.11.2012. godine)
6. Strategija razvoja Univerziteta u Zenici za period 2015-2020. godine
7. Strategija razvoja Zeničko-dobojskog kantona za period 2016-2020
8. Strategija razvoja naučno-istraživačkog i istraživačko-razvojnog rada u Federaciji BiH za period 2012-2022
9. Strategija naučno-tehnološkog razvoja BiH Akademije nauka i umjetnosti Bosne i Hercegovine